

BILTEN



Sadržaj

3	Uvodnik
4	Aktivnosti iz Zajednice
26	Duhovnost

INFORMATIVNE NOVINE ISLAMSKJE ZAJEDNICE BOŠNJAKA U ŠVEDSKOJ
DECEMBAR 2024. / DŽUMADEL-UHRA 1446. H.G.



Poštovana braćo i sestre!

Ovih dana na adrese svih stanovnika Švedske stigla je brošura pod naslovom „Om krisen eller kriget kommer“.

Smatramo da je veoma važno da ovu brošuru svi pažljivo pročitamo. U brošuri su detaljno navedene preporuke, ali i obaveze i zadaci koji proističu ukoliko bi došlo do neke vanredne situacije.

Nema razloga za paniku, niti ovim, ne daj Bože, zazivamo rat, ili neki drugi belaj, ali situacija u svijetu nalaže nam da budemo oprezni i spremni da se odazovemo na poziv onih koji su zaduženi za sigurnost ove lijepe zemlje.

To je naša i vjerska dužnost!

Osim toga, klimatske promjene nas upozoravaju da su moguće i razne druge nepogode.

Još su nam u svježem sjećanju nedavne poplave u našoj domovini...




Zato, uradimo sve što je do nas, a Gospodara svjetova zamolimo da nas sačuva svakog musibeta!

Esselamu alejkum,

IDRIZ-EF. KARAMAN
GLAVNI IMAM

Aktivnosti iz Zajednice i džemata



DŽEMAT MALMÖ: JUBILEJ 30 GODINA DŽEMATA



U predivnom ambijentu Luftkastelletta, jednom od simbola našeg grada, u subotu 19.10.2024. svečanim programom i večerom obilježili smo veliki jubilej, 30 godina postojanja i rada džemata Malmö. Ovaj jubilej je bio počastvovan velikim brojem prisutnih džematlija, članova džemata Malmö, ali i članova drugih naših džemata njih skoro 400, uz naše čestite imame IZBUŠ-a, glavnog imama IZBUŠ-a, te posebne goste, uz prijatnu atmosferu i ukusnu večeru. Ovaj naš jubilej posebno su obogatili i uljepšali naši dragi gosti: - Muftija mostarski dr. Salem-ef. Dedović - Savjetnik Reisul-uleme za Evropu Senaid-ef. Kobilica. - Predstavnici organizacija sa kojima sarađujemo. - Izvođači programa: Mustafa Isaković Ibrahim Bilčević Mubin-ef. Neimarlija Kenan Mačković Halid Hajduković Meho Selimović Enur Imeri Esmā Cetina

Svečanost je započela učenjem odlomaka iz Kur'ana milozvučnim glasom Mubin-ef. Neimarlije, imama džemata u Norrköpingu. Imam džemata, prof. Hasan-ef. Jašarević, poselamio je prisutne džematlije i goste, a zatim kazao najvažnije informacije o džematu, pomenuo važnost Zajednice za naš narod, sve uspjehe džemata, a uputio je i nekoliko savjeta. Prije svega da budemo bir-jedno, da nastavimo brinuti o svojoj Zajednici, te da pokažemo posebno poštovanje ljudima koji su osnovali, kroz različite procese vodili ali i danas vode naš džemat.

Napomenuo je i da je to džemat koji broji 2400 punoljetnih članova, sa uspješnim aktivnostima za sve uzraste. Govorio je o važnosti mekteba, ali i volontiranja i osjećaju da prepoznamo potrebe naše Zajednice. Posebno je istakao rad naše omladinske organizacije, ali i ženskog aktivizma na čelu muallime Merjeme. "Nikada se nećemo u svemu složiti, ali smo zasigurno složni u tome da za našu djecu i naš narod, za našu vjeru i identitet, samo ujedinjimo, složni i jaki, možemo se oduprijeti svim pogrešnim idejama i ideologijama koje danas postoje u društvu oko nas. To je naša Zajednica, naš džemat, ali i sva naša kulturna i humanitarna udruženja koja žive istu ideju kao i mi u ovom gradu". Na kraju imam džemata zamolio je sve prisutne da se Fatihom i dovom sjetimo svih volontera i članova džemata koji više nisu sa nama, ali i da dovom se sjetimo naše braće i sestara u Palestini, posebno u Gazzi, jer suosjećamo sa njima u bolu i patnji kroz koju prolaze, te i zbog toga moramo biti jaki i uspješni da bi mogli pomoći svima onima koji našu pomoć budu trebali.

Nakon imama džemata, skupu se obratio i glavni imam IZBUŠ-a, hadži Idriz-ef. Karaman, koji je sve ovo emocionalno doživio, jer je i sam jedan od osnivača ovog džemata i dao je neprocjenjiv doprinos u njegovom razvoju. Hadži Emir Prlja, predsjednik džemata, poselamio je skup i izrazio zahvalnost Bogu na svemu što je kao rukovodioc džemata imao priliku sa svojim saradnicima učiniti za džemat i Zajednicu. Inače hadži Emir je i najveći vakif našeg džemata, ali i same svečanosti povodom ovog jubileja. Tokom programa obratio nam se i savjetnik reisul-uleme za Evropu i glavni imam IZB u Norveškoj, Senaid-ef. Kobilica. On je izrazio svoje poštovanje članovima džemata i

rukovodiocima, na čelu sa Hasan-ef. i Hadži Emirom. Istakao je da je prvi imam hadži Idriz-ef postavio temelje ovog uspjeha, i da zna koliko je truda i zalaganja moralo biti da bi ovaj džemat imao ovakav impozantan broj članova ali i aktivnosti. Zamolio je da džemat, svoju viziju podijeli i sa drugim muslimanskim zajednicama u Malmeu, koje često imaju problem u integraciji u Švedsko društvo, a naš bosanski džemat u Malmeu bi trebao preuzeti lidersku poziciju kada je u pitanju status muslimana i briga o njima u ovom lijepom gradu Malmeu.



Glavni predavač i naš najvažniji gost bio je cijenjeni Muftija mostarski Salem-ef. Dedović. U svom inspirativnom govoru, poručio je važnost da budemo i ostanemo dobri gosti u ovoj državi, koja nas je primila i dala mnoge mogućnosti. Bitno je, kazao je Muftija, da se čuva džemat, da se čuva identitet i jezik, pogotovo zato što u Švedskoj država priznaje i pomaže očuvanje našeg jezika, a ista ta prava su uskraćena našem narodu u mnogim dijelovima Bosne i Hercegovine. Bitno je da znamo da naš narod ima državu, a da će ona biti snažna onoliko koliko i naši ljudi u dijaspori budu obrazovani, emancipirani i uključeni u političke i društvene procese u zemljama u kojima borava, pa tako i u Švedskoj.

Muftija se zahvalio na pozivu, na lijepom prijemu i prilici da se obiđe naš narod u Švedskoj, a džematu Malmö čestitao na ovom Jubileju ali i imponantnoj svečanosti povodom toga. Tokom ove svečanosti, dodijeljene su i plakete onima koji su se istakli u svome volonterskom radu u džematu. Plakete su dodijeljene: dr. Ašk Gašiju, Sulejmanu Topaloviću i Mustafi Bećireviću.

Organizacijama sa kojima džemat surađuje u promovisanju pozitivnih ideja u ovom društvu, ljubav prema Domovini i Bosanskom jeziku je također uručen znak pažnje. Ova noć će ostati upamćena i po predivnom programu koji su sa svojim bendom, izveli naši najbolji interpretatori ilahija i kasida iz Bosne iz Hercegovine, Mustafa Isaković i Ibrahim Bilčević.

Na kraju, poslužena je i ukusna večera koju su pripremili sa svojom ekipom dvojica kuhara: Mirsad Bulić i Haris

Tasaković, a ukusni kolači i desert bili su djelo ruku hanuma našeg džemata, koje su nenadmašne kada je u pitanju kvalitet, ukus ali i prefinjenost onoga što pripreme. Dovu za beričet na kraju proučio nam je Senaid-ef. Kobilica i time je završena ova svečanost. Ovaj program, na veoma lijep i profesionalan način vodila je omladinka našeg džemata Esma Cetina. Našim džematlijama, članovima, rukovodiocima, imamima, muallimama, svim vjernicima i vjernicama, čestitamo jubilej: 30 godina džemata Malmö, uz dovu Allahu dž.š., da ovih 30 godina naše Zajednice u Malmøu, bude tek početak nečega što će trajati do Sudnjega Dana.



*Prof. Hasan-ef. Jašarević Imam džemata Malmö.
22.10.2024.*

DŽEMAT BORÅS: JUBILEJ 30 GODINA POSTOJANJA I KONTUNUIRANOG RADA



U subotu 9. novembra u kongresnoj sali u Boråsu, održan je svečani program u povodu 30 godina postojanja i rada džemata Borås. Programu je prisustvovao veliki broj naših džematlija, kao i džematlija iz drugih džemata u Švedskoj, dragi musafiri iz Bosne i Hercegovine, predstavnici organizacija i institucija sa kojima je džemat ostvario saradnju.

Prije programa organizovan je ručak za sve prisutne u restoranu "Balder"

Program je otvoren učenjem Kur' ana, hfz. Jusufa Horozovića, imama u džematu Linköping. Bila je ovo prilika da se zahvalimo poje-

dincima i organizacijama na godinama saradnje i podrške džematu.

Zahvalnice su uručene predsjednicima džematskih odbora: Muhamedu Kurtoviću, rah. Bahriji Sušiću, Almedini Sačić, Hasretu Bronji, Halidu Bahonjiću, Jasminu Foči, Ejubu Oglečevcu, Mehmedu Selimoviću i Merfidu Selimoviću, zatim imamima džemata: rah. Fahriji-ef. Katkiću, Sabahudin-ef. Hadžiću i Elvedin-ef. Bešliji.

Prilikom da se obrate ispred džemata imali su predsjednik džemata Mehmed Selimović i Elvedin-ef. Bešlija.

Skupu su se obratili i naši dragi gosti:

Glavni imam Islamske zajednice Bošnjaka u Švedskoj, Idriz -ef. Karaman, Tarik-ef. Buza predsjednik BKC-a, Almedina Sačić ispred udruženja "Bosna" Borås, Mattias Danielsson prvi podpredsjednik općinskog vijeća, Fredrik Hägg-lund poglavar Švedske crkve u Boråsu, Fehim Halilović ispred Merhameta Švedske, Kerim Kapetanović predsjednik Bemufa Švedske.

Zahvalnice su dodjeljene i aktivu žena našeg džemata kao i Bemufu Borås.

U nekoliko navrata tokom programa pristuni su imali priliku da poslušaju učenje ilahija i kaside u izvedbi Mustafe Isakovića.

U centralnom dijelu programa prisutnima se obratio dr. hfh. Kenan Musić, koji je prisutne podsjetio na vrijednosti kojima trebamo biti odani te koje su to važne komponente našeg identiteta.

Voditelji programa bili su Jasmin Fočo i Kemal Ćosić.

Nakon programa druženje je nastavljeno uz kahvu i kolače u džamiji.

Zahvaljujemo se svim našim volonterima koji su dali doprinos u realizaciji ovog programa, našoj vrijednoj omladini kao i aktivu žena našeg džemata, te našoj regionalnog organizaciji BKC-u.

Elvedin-ef. Bešlija



DŽEMAT VÄRNAMO: DONATORSKA VEČE



U subotu, 30. novembra, u Dematu Värnamo održana je donatorska večer s ciljem prikupljanja sredstava za rekonstrukciju Džamije.

Ova manifestacija okupila je veliki broj učesnika i podržavalaca koji su svojim prisustvom i donacijama dali značajan

doprinos ovom plemenitom humanitarnom cilju.

Pored formalnog dijela, večer je bila obogaćena bogatim programom, koji je uključivao inspirativne govore, kulturne sadržaje i zajedničku večeru, čime je stvorena snažna atmosfera zajedništva među prisutnima.

Posebnu čast predstavljali su dodatno obogatio večer. prisutni uvaženi gosti, među kojima su muftija banjalučki Ismail ef Smajlović, naš glavni imam Idriz ef Karaman, kao i drugi imami. Događaj je dodatno uljepšao nastup džematskog hora Nur, Rukaje Mehić Podojak i poznatog umjetnika Eldina Huseinbegovića, čiji je muzički doprinos

Akcija "Budi Vakif" - Ugradi se u trajno dobro, akcija koja još uvijek traje, s ciljem da, ako Bog da, potpuno završimo cjelokupnu misiju!

*Elvir Drinčić,
ispred odbora džemata Värnamo*





Bosniakiska Islamiska samfundet-Församlingen Värnamo
Islamska zajednica Bošnjaka u Švedskoj-Džemat Värnamo

BUDI VAKIF

ugradi se u TRAJNO DOBRO



**Podržimo adaptaciju prve faze interijera
džamije u džematu Värnamo**

Skeniraj
QR-kod



**“Šta god vi udijelite,
On će to nadoknaditi.”**

(Kur'an, Saba:39.)

**UPLATE IZ INOSTRANSTVA :
SWEDBANK AB,331 22 VÄRNAMO
BIC/SWIFT KOD:SWEDSESS
IBAN:SE20 8000 0841 7892 4283 6246**

**UPLATE IZ ŠVEDSKE :
BANKGIRO 5035-9215
SWISH: 123 632 99 40**



123-632 99 40

☎ 073 922 49 32

varnamo@izb.se

DŽEMAT SKÖVDE: AKTIVNOSTI

Naš džemat je u proteklm sedmicama bio bogat događajima koji su okupili zajednicu, jačali naše veze i podsjetili nas na važnost očuvanja vjere, tradicije i identiteta.

SVEČANOST HATMA DOVE

U nedjelju, 27. oktobra, naš džemat je bio ispunjen radošću i emocijama dok smo zajednički obilježili svečanost Hatma dova naših učenika, koji su s velikim trudom i posvećenošću savladali učenje Kur'ana. Ovaj poseban događaj odisao je toplinom i zajedništvom, a osmijesi na licima roditelja, rodbine i džematlija svjedočili su značaju ovog trenutka za našu zajednicu.


Posebnu čast ukazali su nam glavni imam Islamske zajednice Bošnjaka u Švedskoj (IZBUŠ), Idriz-efendija Karaman, te hafiz Ahmed Bukvić, koji je svojim prisustvom i inspirativnim predavanjem obogatio ovu svečanost.

Hafiz Ahmed nas je podsjetio na Ahiret kao našu pravu domovinu, ističući prolaznost dunjalčkog života i važnost usmjerenja ka djelima koja vode vječnoj nagradi. Njegove riječi bile su podsjetnik na suštinske vrijednosti vjere, koje će našim svršenicima i cijeloj zajednici služiti kao vodilja u životu.

Svršenici hatmi:

Dujić Aldin, Džanić Senaid, Džanić Senadin, Opijač Melvin, Salihović Ajna, Mušić Dannis, Talić Ismail, Tahirović Osman, Tahirović Belkisa, Mešić Sadeta, Rahmanović Aldina, Jamadžija Maja, Hodžić Emir, Hukić Latif.

Molimo Allaha, dž.š., da našu djecu učvrsti na putu vjere i obaspe ih Svojom milošću.



OBLIJEŽAVANJE DANA DRŽAVNOSTI BOSNE I HERCEGOVINE

Dana 23. novembra 2024. godine, u prepunom Finskom klubu u Skövde, svečano je obilježen Dan državnosti Bosne i Hercegovine. Ovaj značajan datum okupio je veliki broj naših ljudi, a obilježavanje ovakvih trenutaka svjedoči da negujemo svoju kulturu, tradiciju i identitet, prenoseći ih na buduće generacije. Program je bio izuzetno bogat i raznovrstan. Polaznici mektske pouke oduševili su publiku svojim izvedbama, dok su muški i ženski hor džemata Skövde dodatno uljepšali večer svojim nadahnutim nastupima. Posebnu čast ovom događaju ukazali su naši uvaženi gosti predavači:

Prof. dr. Izet Terzić, dekan Islamskog pedagoškog fakulteta u Bihaću, koji je podsjetio na značaj državnosti Bosne i Hercegovine, te Prof. dr. Mujo Begić, koautor knjige "Koričanske stijene", čije izlaganje je bilo duboko emotivno i poučno.

Ovim putem upućujemo iskrenu zahvalnost svim učesnicima programa, kao i svima koji su doprinijeli organizaciji. Posebno hvala našim vrijednim hanumama koje su pripremile bogatu i raznovrsnu hranu, čime su dodatno obogatile ovaj događaj.

Zahvaljujemo Bosanskom kulturnom centru Västra Götalands na saradnji i kontinuiranoj podršci koju neprestalno pružaju tokom svih ovih godina.

Obilježavanjem ovakvih datuma dokazujemo da smo čvrsto vezani za svoje korijene, tradiciju i identitet, te da s ponosom čuvamo naslijeđe naše domovine.

Na kraju, treba pohvaliti moderatore programa, a kojeg su izuzetno dobro vodili: Melvin Opijač i Amina Batić.

DOMOVINO, SRETAN TI 25 NOVEMBAR DAN DRŽAVNOSTI!

Ovi događaji nas podsjećaju na važnost zajedništva, očuvanja identiteta i prenosa naših vrijednosti na buduće generacije.





UGOSTILI DVA RAZREDA GIMNAZIJE KAVELBRO IZ SKÖVDE

Dana 28.11. 2024., godine imali smo čast ugostiti dva razreda iz gimnazije Kavelbro iz Skövde. Susret je protekao u srdačnoj i dostojanstvenoj atmosferi, gdje smo se trudili približiti našu vjeru na ispravan način, razbijajući stereotipe i predrasude vezane za islam.

Poseban naglasak stavili smo na otvoreni dijalog i međusobno razumijevanje, pružajući priliku našim gostima da postave pitanja i dobiju odgovore iz prve ruke. Nakon edukativnog dijela susreta, organizirali smo tradicionalnu švedsku fiku – pauzu uz kafu i kolače što je dodatno obogatilo susret i stvorilo opušteniju atmosferu.

Naši gosti su izrazili zadovoljstvo posjetom, a mi smo ponosni što smo imali priliku predstaviti univerzalne vrijednosti naše vjere i doprinosti izgradnji razumijevanja među zajednicama.

UGOSTILI UPOSLENIKE ŠVEDSKE CRKVE

Dana, 2 decembra, 2024., u našoj džamiji u Skövde ugostili smo uposlenike Švedske crkve, predvođeni župnikom Martinom Eriksonom.

Razgovarali smo o različitim pitanjima s ciljem poboljšanja saradnje i jačanja dijaloga između naših zajednica. Ovaj susret je pokazao koliko je važno otvoreno komunicirati i dijeliti ideje.

Zahvaljujemo se svima koji su prisustvovali i radujemo se budućoj zajedničkoj saradnji!



Imam Mersed Delić

DŽEMAT LINKÖPING: AKTIVNOSTI



Dana 16. novembra 2024. godine u džematu Linköping, u organizaciji aktiva žena Jedno smo, održan je Humanitarni ručak za poplavljena područja u BiH. Ručku su prisustvovala I hanume iz džemata Trosa, a svoj doprinos ručku također je uručio i aktiv žena Ikre džemata Borås. Hafiza Merima Horozović održala je predavanje o važnosti i vrijednosti sadake i udjeljivanja, a gošća muallima Merjema Jašarević nas je kroz svoju životnu priču i djelovanje u organizaciji *Budi dio hajra*, podstakla i podsjetila kako da treniramo humanost koju svako od nas posjeduje.

U konačnici prikupljena sredstva će, ako Bog da, preko organizacije *Budi dio hajra* biti uručena porodici iz Fojnice, koja je posljedicom poplava izgubila kuću. Zahvaljujemo se svima koje su svojim prisustvom uveličale ovaj skup i nadamo se da će ovakva aktivnost sa fokusom na humanost i međusobno pomaganje, biti samo prva od mnogih koja će zaživjeti u našim džema-tima. Posebna zahvala aktivu žena *Jedno smo* na inicijativi i organizaciji.

Jusuf-ef. Horozović

DŽEMAT MALMÖ: AKTIVNOSTI

SEMINAR ZA ŽENE

Seminar za sve žene i djevojke održan je u džematu Malmö, 23. 11. 2024. godine.

Na temu "Uticaj društvenih mreža na brak i porodicu" je govorila mr. prof. Šuhra Terzić. Seminaru se odazvalo preko stotinu žena i djevojaka džemata, te time uveličale skup, ali i potvrdile da su ovo ključne teme za naše društvo i stanje. Izdvojiti ćemo misao iz predavanja: *"Mediji i tehnologija je nužna potreba današnjice i definitivno nešto što spaja razdvojene, ali i razdvaja spojene."*

OBILJEZEN DAN DRŽAVNOSTI SA NAJMLAĐIMA

"Bosanski slovoljubci" je džematska aktivnost u cilju očuvanja bosanskog jezika. Kao i svake godine kroz naše sve aktivnosti smo protkali priču o očuvanju Bosne i Hercegovine, jezika kulture i tradicije. Ove godine nam je fokus bio na naš najmlađi naraštaj. Njihova ljubav, sreća uz ovu aktivnost je uljepšala naše obilježavanje praznika dana državnosti Bosne i Hercegovine te poslala jaku poruku:

"RASTEMO I UČIMO O TEBI
DOMOVINO NAŠA"

Merjema Jašarević, muallima



DŽEMAT JÖNKÖPING: AKTIVNOSTI ZA ŽENE



U džematu Jönköping, u organizaciji ženskog aktivizma IZBUŠ, održan je edukativno-interaktivni seminar na temu "Izazovi i prioriteti u roditeljstvu".

Gost-predavač je bila socionom Indira Beharić, uposlenica socijalne službe (socialtjänsten) u gradu Malmö. Seminar smo počeli sa odlomcima Kur'ana koje je proučila muallima Halima Terzić te se u svojstvu domaćina obratila prisutnima. Nakon toga se predstavila gošća i predavačica koja se kroz dvije sesije predavanja osvrnula na izazove s kojima se skoro svaki roditelj susreće, kako ih prevazići, šta prioritariti i na kraju, kako to Indira naglašava, potruditi se da budemo "Veći, jači, pametniji, ali dobri" roditelji.

U drugom dijelu istakla je definiciju socijalne službe, na koji način ona funkcioniše u Švedskoj, u kojim sve poljima nudi pomoć i podršku ljudima i kako surađivati s tom institucijom za dobrobit i nas i našeg djeteta. Zahvaljujemo se Indiri na veoma korisnom i inspirativnom seminaru, kao i ženama iz drugih džemata koje su danas bile tu sa nama. Hvala i džematu Borås na prigodnom poklonu te Komisiji za ženski aktivizam na čelu sa predsjednicom muallimom Merjemom Jasarevic. Radujemo se ponovnim susretima nekom drugom prilikom.

Halima Terzić, muallima

DŽEMAT HELSINGBORG: PROGRAM "LIJEPA RIJEČ"



Sa imenom Boga, Milostivoga, Svemilosnoga!

"Ikre, prva je mudrost, Knjigo, koju nam kazuješ!

Vremenom Milostivi kune se u tebi.

A ti u nama, šehadet budiš.

Šehadetom svjedočimo istinu neprolaznu.

*Zato danas evo, želimo, zagrliti mudrost
kazivanja tvog, Knjigo!*

I neka slovo tvoje uvijek bude misao moja!

*Ti koja si govor Milostivog i vječna opomena
smrtniku što u prah se pretvara!*

*Oplemeni duše griješne istinskom ljubavlju i
čežnjom za susretom sa Tvorcem znanih i
neznanih svjetova!"*

Ovim uvodnim riječima naših voditelja počeo je program Lijepa riječ u nedjelju, 1. decembra u Filborna školi.

Naime, mjesec novembar 2024. godine naš džemat je završio za tačno 800 članova. U znak zahvalnosti svim članovima, ali i

podsjecanja na važnost okupljanja oko Zajednice, organizirali smo program kojeg smo nazvali Lijepa Riječ.

Također, u decembru 2024. naš džemat obilježava i 24 godine od svog osnivanja.

Sve su to bili dovoljni razlozi da se okupimo i nekoliko sati družimo sa našim gostima i raznovrsnim programskim sadržajem.

Obraćanja Muftije banjalučkog i Glavnog imama IZBUŠ-a, ilahije i sevdalinke hora Sewsen, recitali mektebskih učenika, kratki film o džematu, odlomci iz knjige "Moja priča", sjajnim mladi voditelji, kahva i susreti...učinili su da ovaj program bude više od događaja, učinili su da bude doživljaj za duše svih prisutnih.

Hvala svima na Lijepim riječima, emocijama, pozitivnoj energiji i doprinosu svim projektima i lijepim pričama koje zajedno pišemo.

Radujemo se narednom susretu, ako Bog da.

N.Š.

ODRŽAN ZAJEDNIČKI SASTANAK RUKOVODSTAVA ORGANIZACIJA KOJE DJELUJU U SASTAVU ISLAMSKJE ZAJEDNICE BOŠNJAKA U ŠVEDSKOJ



U subotu, 14. decembra 2024. godine, u Örebrou je održan zajednički sastanak rukovodstava organizacija koje djeluju u sastavu Islamske zajednice Bošnjaka u Švedskoj.

Sastanku su prisustvovali gotovo svi članovi Izvršnog odbora IZBUŠ-a, Glavnog odbora Bemufa, kao i Upravnog odbora Udruženja ilmijje IZBUŠ-a.

Na početku sastanka prisutnima se obratio muftija goraždanski Remzija-ef. Pitić. U svom izlaganju muftija je posebno naglasio važnost odgovornog pristupa amanetu koji se preuzima ulaskom u rukovodstvo neke od organizacija pri Islamskoj zajednici.

U nastavku sastanka analizirane su ovogodišnje zajedničke aktivnosti i razmatran okvirni plan aktivnosti za narednu godinu. Prisutni su izrazili zadovoljstvo saradnjom u protekloj godini, te iskazali spremnost za nastavak zajedničkih projekata.

Na kraju je inicirana sjednica Savjeta Bemufa na kojoj bi se diskutiralo o susretima i drugim aktivnostima na centralnom nivou.

I.K.

ODRŽANA SJEDNICA IZVRŠNOG ODBORA IZBUŠ-A



U nedjelju, 15. decembra 2024. godine, održana je redovna sjednica Izvršnog odbora Islamske zajednice Bošnjaka u Švedskoj.

U prvom dijelu sjednice analizirani su zaključci sa posljednje sjednice, nakon čega je izraženo zadovoljstvo njihovom realizacijom.

Izvršni odbor je donio odluku da se u buduću, koliko je god to moguće, izbjegava zakazivanje sjednica u vrijeme održavanja mektske nastave.

U nastavku sjednice Izvršni odbor je usvojio prijedlog kalendara aktivnosti za narednu godinu, te donio odluku da se Skupština Islamske zajednice Bošnjaka u Švedskoj zakaže za 5. april 2025. godine.

Na kraju je Izvršni odbor razmatrao pristiglu poštu i donio nekoliko odluka u vezi s tim.

I.K.

Promocijom knjige “Status drugog u Islamu” obilježena 83. godišnjica Banjalučke rezolucije



U okviru planiranih aktivnosti Medžlisa Banja Luka povodom obilježavanja 83. godišnjice od potpisivanja Banjalučke rezolucije, u utorak 12. novembra 2024. godine, u Ferhat-pašinoj džamiji održana je promocija knjige “Status drugog u Islamu”, autora mr. Asmir-ef. Salihovića.

Promotori knjige bili su Muhamed Jusić, direktor Uprave za vanjske poslove i dijasporu Rijaseta Islamske zajednice u BiH, Medina Mehmedović-Mulilić, voditeljica Odjela za saradnju s državnim institucijama i nevladinim organizacijama i Upravi za vanjske poslove i dijasporu i autor knjige mr. Asmir-ef. Salihović.

Glavni imam Medžlisa Banja Luka hfz. Muamer-ef. Okanović je u ime domaćina poselamio prisutne i poželio im dobrodošlicu, a potom se prisutnima obratio direktor Jusić,

koji je, između ostalog, prisutnim predstavio određene dijelove Banjalučke rezolucije i ukazao na njen značaj u vremenu u kojem je potpisana.

Ovom prilikom posebno je istaknuo važnost suživota, tolerancije, pomaganje drugog i drugačijeg na primjerima iz bogate povijesti islama.

Govor je završio porukom da uspijevaju oni narodi koji su inkluzivni, otvoreni i imaju vrijednosti koje mogu ponuditi svijetu, dok su oni koji su zatvoreni i nisu inkluzivni osuđeni na propast.

Medina Mehmedović-Mulalić je istaknula pojedine dijelove iz knjige i ukazala je na važnost djela “Status drugog u Islamu” u društvenom kontekstu i vremenu u kojem živimo, te na koji način nam ova knjiga može pomoći u našoj svakodnevnicu i relacijama sa nemuslimanima.

Autor djela Asmir efendija je u svom izlaganju, između ostalog, predstavio razloge i ciljeve pisanja knjige "Status drugog u islamu", te je istaknuo značaj pisane riječi i knjige za život ljudi.

Nakon izlaganja promotora, prema predviđenom programu promocije knjige, poruku je uputio i Ismail-ef. Smajlović, muftija banjalučki.


– U kontekstu sjećanja na Banjalučku rezoluciju ono što treba promišljati jesu temelji vjere koji su bili pokretač potpisnicima da to učine u Ferhat-pašinoj džamiji. Vjera je zaštita pojedincu koji njeguje svoju narav, a svakako ibadetima namaza, razvija sebe i sve oko sebe. Mi se trebamo osloniti na čiste i čvrste smjernice vjere i graditi i razvijati bolju i ugodniju životnu sredinu – kazao je muftija Smajlović.

Porukom iz Banjalučke rezolucije "Možemo i trebamo da živimo jedni pored drugih, odnosno jedni sa drugima kao ljudska bića koje sudbina (Božija odredba) usmjerava kako se odnositi prema zlu" muftija Smajlović je završio svoje obraćanje.

Potom je proučena Fatiha za sve potpisnike Banjalučke rezolucije, te je Ismir Husedžinović, predsjednik Izvršnog odbora Medžlisa Banja Luka, uručio Asmir-ef. Salihoviću zahvalnicu za džemat Helsingborg iz Švedske, koji je zajedno sa svojim vrijednim imamom Nezir-ef. Špiodićem obezbijedio po jedan primjerak knjige za sve učenike i učenice Medrese "Reis Ibrahim-ef. Maglajlić".

Moderator programa bio je Admir-ef. Blitović.

(A.B./Preporod.info)



Džemat	Broj članova 31. 10. 2024.
MALMÖ	2363
STOCKHOLM	1849
GÖTEBORG	1570
NORRKÖPING	1252
OREBRO	1244
BORÅS	1060
SKÖVDE	895
LANDSKRONA	878
HELSINGBORG	793
VÄSTERÅS	786
GISLAVED	756
LINKÖPING	743
JÖNKÖPING	677
VÄRNAMO	650
VÄXJÖ	575
TROLLHÄTTAN	521
HALMSTAD	515
TRELLEBORG	444
VETLANDA	252
MOTALA	224
VARBERG	223
KALMAR	217
TROSA	197
SURTE	175
KARLSTAD	136
OSKARSHAMN	79
UKUPNO	19.074

ČLANSTVO U ISLAMSKOJ ZAJEDNICI
ČUVAMO NAŠU VJERU, TRADICIJU I IDENTITET



BOSNIAKISKA ISLAMISKA SAMFUNDET

ISLAMISKA ZAJEDNICA BOŠNĀKA U ŠVEDSKOJ



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

UČLANI SE I TI
U NAŠU **ZAJEDNICU**

naša **ZAJEDNICA**

*naše trajno
dobro*




*“Što god vi udijelite, On će to nadoknaditi,
On najbolje opskrbljuje.”*


(Sebe', 39.)

**ČLANSTVOM U ISLAMSKOJ ZAJEDNICI
ČUVAMO NAŠU VJERU, TRADICIJU I IDENTITET**

BIS
Åkerssjövägen 10
461 53 Trollhättan

Telefon: 0763-10 24 47
E-mail: kontakt@izb.se
www.izb.se





Duhovnost



DOVA

Kao što čovjek na Zemlji nije ostao bez poruke (Objave) od Stvoritelja, tako i čovjekovo zazivanje i moljenje Njega, uzvišenoga Boga (du'ā; u bosanskome: dova) da mu podari i dā ono najbolje što želi – nije bez odaziva i odgovora. Taj Božanski odgovor na čovjekovu dovu u Kur'anu je označen riječju istidžābe, tj. "odgovaranje", "uslišavanje". Kur'an pridaje najviši značaj pojmu istidžābe, što se vidi iz činjenice što potvrđuje da je nesposobnost za istidžābe jedan od najupečatljivijih znakova nekog lažnog božanstva.

A čovjeku je kao slabašnom biću itekako potreban čin zazivanja i moljenja Stvoritelja, ne samo zbog toga što ga u životu prate teški i turobni trenuci, izvjesne opasnosti, strahovi i svakovrsni rizici, već i onda kada (ga) život prolazi u rahatluk, zdravlju, zadovoljstvu i lahkoći; jednom riječju: u hajru, dobru. Zapravo, većina ljudi života provede i provodi u višestrukom dobru za njih i njihove najbliže.

Dova, dakle, kao molba upućena uzvišenom Allahu nije rezervirana samo u slučaju teških životnih iskušenja, koja su neminovna, već i u slučaju životnih trenutaka ispunjenih radošću, ugodom i dobrotom: "Koga raduje da mu Allah, dž.š., udovolji dovi kad zapadne u neprilike i teškoće neka često uči dove dok je u lahkoći" (Tirmizi, 3382).

Istovremeno, dova je mnogo više od toga, tj. od pukog ili samo mehaničkog izgovaranja molbe ili molitve uzvišenom Allahu. Naime, dova, s jedne strane, reflektira ili odražava posebnu vezu čovjeka vjernika sa Stvoriteljem, iz čega proizlaze posebnosti, važnosti i značaji nje kao takve. S druge strane, čovjek vezu sa Stvoriteljem, zapravo, dovom na poseban način i održava.

Također, dova je draga Uzvišenome; On voli onoga ko Ga moli, ko Ga doziva; On voli čuti glas nevoljnika – i On se, u to nema sumnje, odaziva molbi molitelja kada Ga zamoli.

Pa zašto, onda, propuštati tako nešto veliko?! Zašto se ne obraćati i moliti, uporno moliti, Onoga ko nas voli i odaziva se?! U suprotnome, na velikom smo gubitku, a pogotovo ako sebi umislimo da smo sâmi sebi dovoljni ili da, neuzubillah, sumnjamo u odgovor Onoga ko je Gospodar i Stvoritelj svih svjetova!

Dova je ibadet

Na prvome mjestu podsjetimo se na hadis u kome se kaže da je dova ibadet: Ed-Du'ā' huve l-'ibāde (Tirmizi, 3372). Nakon tih riječi, Poslanik, alejhisselam, proučio je 60. ajet sure el-Mu'min:

"I rekao je Gospodar vaš: 'Zovite Me, Ja ću vam se odazvati! Oni koji iz oholosti neće da Mi robuju, ući će u Džehennem poniženi.'"

U drugom hadisu Poslanik, a.s., eksplicitno je ukazao na još veći značaj dove riječima: "Dova je srž/suština ibadeta" (Tirmizi, 3371).

Izvorna riječ u hadisu koju smo preveli pojmom srž/suština glasi muhh, koja, također, može označavati i mozak. Ovo navodimo stoga što se ovdje krije jedna značenjska poenta u smislu da je ono što je za čovjeka mozak za ibadet je - dova!

Tumačeći gore navedeni ajet (el-Mu'min, 60), imam Ševkani veli: "Dova po sebi, uzimajući u obzir njezino suštinsko značenje, predstavlja ibadet. Štaviše, suštinu ibadeta, kako se o njoj kaže u vjerodostojnom hadisu. Uzvišeni je naredio robovima da Mu upućuju dove i obećao im ih je uslišati" (Fethu l-kadīr, 1305).

Dova je oružje

U susretu sa životnom stvarnošću i izazovima različitih vrsta vjernik je opskrbljen posebnom zaštitom. Zapravo, oružjem, kako se to naznačava u hadisu: "Dova je oružje (silāh) vjernika" (Hakim, El-Mustedrek, 2/2). U istom ovom hadisu još se za dovu ističe da je "temelj vjere i svjetlo nebesa i Zemlje".

Jer kada vjernik dovi Allahu, zaziva i moli Sveznajućeg, Najplemenitijeg, Svemoćnog... Stoga je dova najmoćnije oružje u rukama istinskih i iskrenih vjernika, i zato se od njih traži da ga što više i češće koriste: "Kada neko od vas nešto želi, neka traži mnogo, jer On traži od svoga Gospodara, uzvišenog i veličanstvenog" (Taberani, Evsat, 2/301).

Nadalje, naš Stvoritelj voli da se od njega traži:

"TRAŽITE OD ALLAH DA VAS DARUJE IZ RIZNICA SVOG DOBRA! ZAISTA ON, DŽ.Š., VOLI DA SE OD NJEGA TRAŽI. NAJBOLJI IBADET JESTE IŠČEKIVANJE IZLAZA (IZ TEŠKE SITUACIJE)" (TIRMIZI, 3571).

Ne doviti ili ne tražiti od Uzvišenog nosi rizik izazivanja Njegove srdžbe: "Ukoliko neko ne traži od Allaha, On se ljuti na njega" (Ibn Madže, 3827). Dakle, dova otklanja Božiju srdžbu. Iz ovog hadisa zaključujemo da je doviti Njemu jedna od naših važnih dužnosti ili obaveza jer izbjegavati ono što izaziva Njegovu srdžbu, bez sumnje, jeste obaveza!

Www.islam.ba Autor: Almir Fatić

OKRIVITI SIHR NIJE RJEŠENJE ŽIVOTNIH PROBLEMA

U cilju rješavanja određenih zdravstvenih i drugih životnih problema ljudi nerijetko odlaze nadriljekarima, koji uz znatne iznose novca obećavaju izliječenje ili rješavanje problema.

Ove osobe se predstavljaju kao efendije i hodže, proroci, učaci rukje, bioenergičari itd., a prilikom svojih seansi nastoje vjerom i vjerskim simbolima sakralizirati svoje metode liječenja. Drugim riječima, iskoristavaju vjeru u svojim nedoličnim radnjama. Razgovarali smo s mladićem iz Sarajeva koji je duži vremenski period odlazio različitim „ljeekarima“ i šejhovima kako bi dobio određenu pomoć.

Cijena terapija

Svoja iskustva s nadriljekarima sažeo nam je hronološki. „U Visokom sam plaćao 100 maraka po tretmanu. 'Dijagonsticirao' mi sihr. Dobivao vodu i zapise da potapam i pijem. Nakon godinu dana osjećao sam se još gore. U Sarajevu plaćao 25 maraka za rukju po tretmanu tri puta sedmično. Kazali mi da sam pun džina i sa sam još ograio. Taj 'učač' uopšte ne citira ajete nego čita knjigu s hadisima. U Zavidovićima plaćao 50 maraka po tretmanu svakih sedam dana. Kazao mi da sam pojeo sihr. Dobivao nekakve

čajeve da mi, navodno, pospješe izmokranje i stolicu kako bih izbacio sihr iz sebe. U Kaćunima kod jednog 'šejha' diagnosticiran mi sihr i džinsko opsjedanje. Dobio neke zapise da pijem i plaćao 50 maraka po tretmanu. U Hrasnici došao u prostoriju od 20 kvadrata gdje je bilo oko 30 ljudi, a 'hodža' bio u drugoj prostoriji kao učio nešto. Dvoje-troje se počelo bacati po podu. Vjerovatno su u dogovoru s tim 'hodžom', jer su se na svakoj seansi jedni te isti bacali. Plaćao 20 maraka po seansi svakih sedam dana, ali nikakvog pomaka nije bilo.

Na kraju dobio instrukciju od dvojice vjernika da bezveze bacam pare i da jedino sam sebi Allahovom voljom mogu pomoći, odnosno učenjem i slušanjem Kur'ana, jutarnjim i večernjim zikrom, kao i da sam sebi učim ajete iz Kur'ana na vodu i to pijem.

Hvala Allahu povukle se sve tegobe nakon pola godine, a u tom procesu često mi je udarala krv na nos bez razloga i često sam povraćao. Na taj način sam se uvjerio da je cilj svakog nadrihodže lična korist i finansijska dobit, jer su neki podigli cijene do 3.000 maraka za tretman ljudi iz dijaspora“, kazao je Vahid H. iz Sarajeva.

Sihir kao izvor svih problema

S druge strane, postoje osobe koje nisu pod nikakvim utjecajem sihira, već umjesto suočavanja sa životnim problemima pribjegavaju traženju razloga svojih problema u sihru. To svjedoče i osobe koje se uistinu bave ispravnom metodom liječenja sihira. „Većina osoba koje dolaze na rukju zapravo imaju pogrešne psihološke obrasce, emocionalne probleme, iracionalna ubjeđenja te brojne strahove koje ne mogu sami pobijediti. Psihološka i psihosocijalna savjetovanja, u kombinaciji s islamskim savjetima u cilju jačanja imana, imaju puno jače dejstvo od učenja rukji, posebno kada se uzme u obzir da većina učaća nema ni najosnovnija znanja o razvoju ličnosti, psihološkim i emocionalnim poremećajima te brojnim posljedicama koje mogu nastati uslijed pogrešnog dijagnosticiranja samog klijenta“, kazao je imam Mithat Mujović iz Beča.

Sličnog mišljenja je i hafiz dr. Elvir Duranović koji smatra da sihir, ako je uopšte o njemu riječ, može biti samo kratkotrajnog učinka, a da ljudi u većini slučajeva traže razloge svojih problema u sihru te tako produžuju svoju agoniju godinama.

„Neki ljudi ciljano i s lošim namjerama u današnje vrijeme šire priče i glasine o presudnom utjecaju sihira i džina na svakodnevni život čovjeka. S takvim pričama obične ljude su do te mjere preplašili da im se u svemu, što im se dešava u životu, počeo priviđati džinski dodir. To je velika varka i obmana. Džini su Božiji robovi kao i ljudi. Ništa se na ovom svijetu, ni dobro ni loše, ni sihir, ni džinski dodir, ne događa bez Božijeg znanja i Njegove odredbe. Jasno je, stoga, da oni koji prave zapise za liječenje i

oni koji uče Kur'an za liječenje nisu adresa na koju se ljudi u nevolji trebaju obraćati. Treba uskladiti svoj život s islamskim propisima i onda nema tog džina niti sihira koji dugoročno može naškoditi ili neku štetu učiniti“, kazao je hafiz Duranović, koji ističe da nekima odgovara pisanje i promoviranje sve većeg broja djela i tekstova o utjecaju džina, čak i vjerski argumentiranih, jer u tome pronalaze svoj hobi, utjecaj među narodom, ali i materijalnu dobit kako od prodaje tih knjiga tako i od samog liječenja. Kada se uzme u obzir sve veći fond knjiga i tekstova s temam o sihru i džinima, ova tvrdnja ima i svoje utemeljenje.

Obrazovanje imama

Kako je riječ o složenom problemu za koji treba multidisciplinarni pristup, efendija Mithat ističe važnu ulogu Islamske zajednice u obrazovanju imama po ovom pitanju.

„Zadnjih nekoliko godina imamo raširenu pojavu samoproglšenih liječnika koji u svakom problemu koji se tiče pojedinca, porodice ili zajednice vide uplitanje džina. Misteriozne priče koje dolaze od takvih 'liječnika', dodatno opterećuju i plaše ionako već napaćene, izmorene i uplašene Bošnjake. Smatram da Islamska zajednica treba početi s rješavanjem ovih problema na način da pokrene dodatna usavršavanja imama na polju psihosocijalnog savjetovanja kroz dobro osmišljenje tečajeva u čijem bi pripremanju, pored teologa, učestvovali psiholozi, psihoterapeuti i psihijatri“, kazao je efendija Mithat, koji radi i kao bračni i psihosocijalni savjetnik.

Www.islam.ba, Elvedin Subašić

NADA ZA KRŠĆANE!

Ktome, ima i onih čitatelja Kur'āna koji samom tradicijom islama nisu pripremljeni da "zaimaju cjelinu Kur'āna", te će i oni o svetoj knjizi islama zaključiti kako je prepuna stranica na kojima se u pregrštima saopćavaju "beskompromisna motrišta" i "šamaranja" i "progoni" nemuslimanskih ljudi i čovječanstava na sve četiri strane svijeta.

Ukratko, iz mnogih knjiga napisanih o Kur'ānu perom "nevještih" i "nevičnih" čitatelja, na nemio način saznajemo njihove zaključke: Kur'ān je jedna "odbojna" knjiga, ona ne priznaje nikoga drugog osim muslimana ili "svojih vjernika"!

Ali, s Kur'ānom stvari ne stoje tako nigdje, pa ni onda kad govori o kršćanima. Krenemo li redom, mi ćemo doista zapaziti da Kur'ān sadrži "kritiku nekih kršćanskih dogmi", npr. dogme o Trojstvu. U suri Trpeza/al-Mā'ida, 5:73., kaže se: "Nevjernici su oni koji tvrde: 'Bog je treći od trojice!'" I na nekoliko drugih mjesta u Kur'ānu imamo nalične proklamacije kojima se odriče da "Bog ima dijete" i tome slično.

Ali, gledan i čitan u svojoj sveukupnosti, Kur'ān je knjiga koja nudi vedro nebo, koja otvara svijetle horizonte. U istoj suri koju smo maloprije naveli, u sūri 5:82., obznanjuje se:

*"Sigurno ćeš [o Muhammede] naći
da su vjernicima [muslimanima] prijateljstvom
najbliži oni koji vele: 'Mi smo kršćani!'
To je zato jer među njima svećenika ima i monaha*

i zato jer se oni ne ohole."

Ima još barem nekoliko mjesta u Kur'ānu gdje se o Sljedbenicima Pisma [Biblije] iznose pohvalne stvari. Dakako, najkarakterističnije mjesto u Kur'ānu u ovom smislu je sūra 2:62., koja obznanjuje:

*"Onima koji su vjerovali, i onima koji su bili jevreji,
i kršćani, i Sabijci, koji su u Boga i Onaj Svijet
vjerovali
i dobra djela radili, pripada nagrada njihova
kod Gospodara njihova!
Njima nema straha i oni neće očajavati."*

U neznatno drugačijoj formulaciji ovaj se proglas ponavlja i u sūri Trpeza/al-Mā'ida, 5:69.

Prema rečenom, temeljna knjiga islama ne izopćava kršćane iz Božije milosti. Kur'ān ne lišava kršćane mogućnosti da tu milost zasluže, baš kao što je i sami muslimani trebaju zaslužiti.

Muslimani, time što su muslimani, nisu postali vlasnici Božije milosti.

Niti su muslimani, time što su muslimani, dobili ulogu "čuvara raja" ili ulogu onih koji čuvaju "ključeve raja".

Ovo treba imati u vidu uvijek, napose kad se raspravlja sa kršćanima o zajedničkom dobru na Ovom svijetu.

(...)

Crtice iz Kur'ana, Enes Karić

KAD SE KNJIGA ZATVORI...

Znamenitim motivom Kur'āna, onim da svijet i cijeli Univerzum na svojim stran(ic)ama sadrže znakove (āyāt) iz kojih saznajemo da Bog ima i da postoji Božija svemoć, premrežen je cijeli Kur'ān.

A i sam Kur'ān je, također, knjiga koju sačinjavaju znakovi (āyāt). To nas navodi da naslutimo sljedeće: Listajući Kur'ān mi, u načelu, "listamo" cijeli svijet! Egzistencijalna pozicija čovjeka na Ovom svijetu je da hodi između dvije vrste Božanskih znakova (āyātu 'llāh), Božanskih znakova u svetoj knjizi i Božanskih znakova u svijetu, svemiru. Te dvije vrste znakovlja su komplementarne.

Zapravo, davno su komentatori uočili da se iz Kur'āna jasno pomalja motiv svijeta kao jedne knjige. Svijet se kreće, svjetska ili svemirska knjiga se lista, znamenja se pomaljavu, mnoga, jedno po jedno, na mirijade njih, neizbrojivo. Kao da se zadrže neko vrijeme pred našim očima i ušima, pa potom odlaze u dubine svemira, baš onako kako se i komete jave na svome putu, pređu preko nama susjednog nebeskog svoda i opet odu u dubine svemira, slijedeći svoje tajanstvene puteve. I nama nepoznate zadaće.

Ali, i cijeli svijet, Univerzum u svojoj sveukupnosti, ukratko: svi svjetovi, vidljivi i nevidljivi, u Kur'ānu su na jednom mjestu uprizoreni kao jedna knjiga. Dovoljno je nakratko osmotriti suru al-Anbiyā/Vjerovjesnici (21:104), u njoj se daje moćni proglas o jednoj sceni nastupanja Sudnjeg dana:

"A na Dan kad smotamo nebo Mi

- kao što se smota list knjige

- i kao što smo prvi put iz ništa stvorili,

tako ćemo opet iz ništa stvoriti!"

Na ovom mjestu Kur'ān zbori o tome da je Bogu posve lahko "završiti sa ovim Univerzumom" tada kad se njegovom ciklusu prikuči kraj. Bog će smotati ili sklopiti i zatvoriti Univerzum (na ovom mjestu za njega se kaže: "nebo"), to će Bogu biti "tako lahko" učiniti baš kao što je čovjeku lahko smotati ili zaklopiti listove knjige!

Sve ono znakovlje Univerzuma (āyāt) će se sklopiti među korice knjige koju će Bog zatvoriti. Nestaće Univerzuma u kojem smo bili, koji je bio tu unaokolo nas.

Ali, hoće li to biti kraj svega? Hoće li nastati stanje jedne zauviječne "samosti Božije"?

Iz ovog mjesta u Kur'ānu (21:104) vidimo da sa "sklapanjem [knjige Univerzuma]" neće nastati kraj. Naprotiv, posve jasno slijedi jedan optimističan proglas Kur'āna:

- i kao što smo prvi put iz ništa stvorili,

tako ćemo opet iz ništa stvoriti!"

Tako će stvaranje opet započeti, tako će se Božija milost opet očitovati u mirijadama stvorenih svjetova. Božanskim tajnama i svrhama neće nikada nastupiti kraj.

Crtice o Kur'anu, www.preporod.com

FACEBOOK



You Tube

IZBUS

WWW.IZB.SE



Media centar
Islamske zajednice u BiH

Radio



Novina

Preporod
ISLAMSKA
INFORMATIVNE
NOVINE

Agencija



Portal



Produkcija





islam.ba

Bilten Informativne novine
Islamske zajednice Bošnjaka u Švedskoj

glavni urednik Idriz-ef. Karaman,
glavni imam

Izvršni urednik Nezir-ef. Špiodić

e-mail: bilten@izb.se

web: www.izb.se

izdavač: Islamska zajednica Bošnjaka u Švedskoj

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10,
461 53 Trollhättan



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

"Jedna lijepa riječ može
zagrijati tri zimska mjeseca."
- japanska poslovice

"Ett vänligt ord kan
värma tre vintermånader."
• Japanskt ordspråk

